

摘藻堂四庫全書薈要

集部

欽定四庫全書薈要

集部

陵川集卷二至四



詳校官助教臣謝登雋

欽定四庫全書薈要卷一萬六千一百十八

其部

陵川集卷二

元 郝經 撰

古詩

寓興

弄丸觀古初洞見天地心
不外人與物坦白無幽深
如
何妄意者肺腑戈矛森
亂鑿渾沌竅遂使天機沉
世失
鍾氏子孰與傳希音欲言復無言
感動為長吟

靈源洞無極混混春泉瀉流為川上波晝夜逝不舍榮
枯遞乘除寒暑相代謝化機一闔闢圓方自陶冶君子
惟乾乾惕夕懼以籍勿謂吾道亡中有不亡者

思慮即鬼神所發不可妄人物或可欺鬼神其可誑山
川鬱其傍日月烜乎上化幾速影響昭晰示情狀屋漏
謹操存頃刻不可放重華尚兢業吾儕可浮蕩孳孳持
此心斃已無他望

衆變成大化總萃入神紐渾淪包無外開闔紛參踪伊

人具斯理往往昧所究湮沉血氣中頓躓馬牛後哀哉
何不淑自棄甘凡陋孰能與湔拂俾見高明囿

世運何無涯質文繫所尚弊政與先務取舍定興喪嗚
呼周轍東王室歌板蕩虛文不知革實禍國相望區區
八百祀猥處諸侯上

落日下西極仲尼悲死麟王澤久已熄煽火焦斯人中
原一戰場戈甲埋驚塵驅車屢途窮處處傷問津歸來
續韋編理窟搜鬼神百流收一源炳烺光日新六經垂

天地一視萬世仁

綿綿河畔柳婉婉成盤匝素絲元復黃織組為裳衣迢
遙門外路客子各所之並行不相悖並成不相夷如何
墨翟氏慟哭為傷悲

聖人無常師師襄又郊子無入不自得豈惟柱下史夸
徒以藉口妄誕為評訾當時五千言洞達窮妙理大出
六合外遠探無極始後人弗克承削繩復破軌流漫源
以湮枝披根以死借問蓬壺仙吾道誠爾爾

明堂一牘書制作本至道折衷六代典密理參元造煥
乎其為文表表垂世教豈惟得時制萬世是則效新莽
何為者剽竊資篡盜大典即委地生民弊殘暴至治何
由興有淚滔蒼昊

潛觀聖人用乃在筆削書矯矯百王法挺挺森天誅立
義本忠恕淳風還唐虞後王政苟且舍此由他途僭逆
尋干戈血肉汙皇居遂世不復古永永沉真儒

鹿門有高躅彭澤歸去來劉伶醉不知痛飲銜深盃何

如王夫子教育經濟才河汾大澤流唐運實此開彼伊
皆季世此獨何為哉

坎坎咸秦坑下有六經燼後天百代跡泯泯同一盡厲
階仲尼沒諸子各啟釁短長互相擊世主孰取信異端
實禍因莫將獨罪秦

中原二十世迥無一漢祖關中無一民沛下無尺土寬
仁代暴虐麟鳳消豺虎所欠惟學術不得同湯武擾擾
草竊盜紛紛孺兒女局促無遠略屈強何足數獨有唐

文皇僅得為英主

漢鼎既已墜海內必有歸誠能正德業亦足為王基何
必由禪讓以為篡弑資鬼操勿謂鬼百戰得偷兒征西
題墓隧永世將誰欺

太康晉一統中國威幾振天子無遠略宰貳爭欺徇清
高機務廢曠達廉節盡往往矜豪奢珠璧家充牣構成
骨肉禍結起邊夷釁自此中國亡罪莫加石晉

天王不巡狩高居事遊燕侈心自茲啟欲歷寰海遍陋

矣逢惡儒拜疏請封禪名數聖無徵事典不經見萬乘
壓川谷供具窮寓縣鏤玉以銘德千古示誇衒豈知蘊
藻菜足作王公薦茂陵休著書請讀史鮑傳

周謗尚赤舄孔尼猶弦歌大節窮乃見首陽高嵯嵯白
刃義可蹈之死矢靡它子雲漢巨擘問學崇丘軻投閣
遽隕獲劇秦真媿音宴阿玄文與法言辨口徒增多與器
不與節天命其如何

道入王霸雜氣逐山河分有才或不德有武或無文小

智私已甚竊位徒自尊患失以持祿往往植禍根
采采商山芝麋麋秦庭鹿商山白雲深不見秦庭骨乾
坤百戰場松下纔終局笑殺子房公幾被高皇戮
伊尹五就湯嚴陵不臣漢所履元不殊心跡孰與辨濟
時與全節亦各適所願紛紛夸毘子利欲迷生死黃塵
事走趨青山為仕途

昊天有至文倬彼雲漢章秋風波洞庭漪瀾肆汪洋嗟
哉破觚士狗辭剝肝腸執柯以伐柯元氣為凋傷千金

享弊帚魚目誇夜光道喪實昧昧浮偽方翱翔孰為撫
其華立聖追義皇

昂昂兩飛鳥不知何許來結巢黃金殿弄語登瑤臺吾
民競奔走恍惚為驚猜或為魯鷄鶩拜祀祈矜哀或為
長沙鵬與世生殃災歲久卵翼繁百千為朋儕山水割
膏腴構宇凌天街遂令周孔徒凍餒纏霜埃

天容恒青青日月自昏曉此心本澄淨萬事空紛擾日
月不變天萬事不變心洞觀天人際一理神幾深

草木變榮瘁松栢獨守正一色貫四時閱世還無竟咄
嗟樵蘓子仰視驚盼矐雖云梁棟姿不免斤斧橫顏夭
跖乃年匪道實維命非為桎梏死亦非寒餒病修身以
事天終自為賢聖

西山有佳色東溟浩淵波區宇仍崢嶸雷風相盪磨借
問先天公吾道其如何麟鳳久不來西伯安在哉

俯仰天地間吾身眇何許百年交一臂竟自為黃土灌
以仁義波植之天人圃握蘭當靈風清芬遍寰宇可與

無極翁乘化遊千古

秋風吹幽蘭明月照寒江
戛然一長嘯遺響纏飛霜
有味非蓴鱸齒頰流水漿
遠駕中和車高遊一氣傍
瀛溪訪達叟深探先天囊

有飲不滿盃有蓄不盈握
牀頭一卷書即是平生樂
落日從昧沒浮雲盡輕薄
且濯冠纓塵不爽崆峒約

碧海驚蕩滴

音聿

中無安穴鱗風濤浩無際
我來方問津

飛流霑衣裳顧眄潛悲辛
扶桑繫孤槎不見同舟人
浩

歌登日觀喚起雲中君

元臺上凌虛中有帝子室縱橫羅萬家曠蕩含虛碧我
有今借契竭來為扣擊無聲亦無臭默默還寂寂時有
清風來颭爽吹江石漠然竟無應真似無知識

瞬目一晝夜寤寐一死生為善尚不及作惡竟何成仲
尼幸知過顏子不復行君看貫盈者果莫逃天刑

皇天分四時庶類能蕃殖聖人定四經萬世扶人極率
經以事天非聖即為賢人事乃天道大經即天言下學

上達理捷徑餘無先

骭髀一丈夫鼓掌下崆峒
嵩高看山色杳杳乘長風
悴然兩頰春不語指西東
偶來洛下居舉世忻相從
三年忽成市遂為天地中
世人竟不識耳目如聵聾
問之皇極君乃是無名公

朱絃寂無聲太羹淡無味
其中還有物磊磊軒天地
毫末晉楚富眇小王公
勢孟賁弱其勇離朱暗其智
卷舒穹壤間與化同無際

吾道古有統軻死迷其傳昌黎功甚勤突兀排金僊奎
宮吾星會麗天光群賢太極出面目伊洛開淵泉吾道
本吾心心在道即全但使心不昧吾道長昭然

北風

北風胡為來掣箭飛沙石無乃化樞逆顛負塵昏塞萬
竅怒一吼土口哆一吸憤叱一氣轉大呼天地窄掃平
長城隍卷起黑山磧野馬突空走舊雪來塞北曠宇驚
崢嶸六合危屹岌中原一囊土再逐混沌闢靄靄薄扶

搖黃盡勢轉黑堪輿亦不守慘惓歸岑寂卉木盡搖落

鳥獸皆竄跡斷鴻撲雲去下有退飛鷁神熬蔽兩目大

鵬摧六翮有物入驅除迅鋒誰與敵惟餘冀北駒驍騰

數萬匹乘此振威靈踏碎夷夏國吾民一孔僂攣手重

局脊柱時雖不寒口箱復股栗矧此烈烈威露頂裸以

赤破屋簾不閉土坐纔半席鶉懸肘不揜壞褐纔過膝

妻跽子亦仆並日無一食抱臂走道路無奈征賦急肌

裂冰刀割肉死霜矢射骨槁痺不仁氣竭凜不植心飛

靡所薄指直不能屈十室一無在道左骸岸積箕伯方
震怒橫空賈餘力乾坤氣不平更欲吹海立時余亟奔
走欲入蜩殼夕暝排竟不前佇足猶畏偪池水勁作聲
地底生霹靂雲飛月縮艷日落天失色斗尾垂三星擺
蕩光的樂所遇變於前頓覺所守易耽耽道在樓磨天
百餘尺毳幕重重圍光彩耀金碧氣濛翡翠鎖香潤椒
塗壁上有金貂兒銜冰驅熱疾罇俎快號呼淋漓文錦
溼長歌葉落柯笑擲千金壁四座自三春杳與人間隔

俯思心惄惄幾為吾民泣何此有二天天乎不余恤孰
能以此意沛我蒼生澤且息絲稅賦且弭兵戈役四海
一狐續家家趙衰日此意竟誰會歲月逾回遘黎亦冀
休止虺虺以颺颺黎亦冀霽止瞠瞠愈不息何日不鳴
條黃鳥鳴習習五絃解吾愠薰兮來帝室

原古上元學士

麟死九鼎淪萬世無孔孟文字糠粃餘扶藉不絕聖伊
昔大觀季天王始失政中聲入哇淫吾道孰不競金源

東北來一洗河海淨斯文甚濫觴幾墜土梗橫吳楚割
半天瘡痍僅續命伊洛遽騫騰朱張立朝廷弘肆六藝
學俾與日月並中原有奇才詞賦方鬪飮天門黃金榜
赫耀動萬姓君臣此為得父師此為令或者語詩文環
視驚盼矐孰意元化精不遂入昏瞑浚發自蔡党高步
出遼夏墨浸天壤深筆掃風雷勁絲綸帝載熙訓誥王
言瑩諸公繼踵作互執造化柄黃山與黃華雙鳳高躋
蹬清風玉樹鳴千古一輝映有若閑閑公光彩璧月恒

雲煙恣揮灑乾坤快歌詠疊疊金聲鏗矯矯銀鈎硬楊
馮李雷麻嶷嶷霄霄倡應五行連麗天四海望而敬偉哉
遺山老青雲動高興文林剗荆棘翰府開蹊徑秋空玉
琴張搏拊分雅鄭三閭一曲歌忽喚劉伶醒哀哀汴蔡
亡六合為懸磬此老獨巍然聲價駭羣聽振袂凌孤霞
珠壁飛欬警人宗一代文天賦百年盛紛紛夸毗子摶
撫為訾評自謂人勝天詎知天已定行行野史成共為
天下慶作噩建子月投我以照乘節屋驚見斗寒焰忽

蟠亘經也生已晚弗及拜先正窮閭一束書十載成墮
甌學問苟有歸貧窶安足病今乃得溟渤問津有龜鏡
挈我登龍門縉我出虎竄搖搖風中旌茲始見依凭緬
思先世澤于今果無竟嗚呼世道喪欲語寒澁迸何時
倒銀漢與世開艷艷昂頭冠三山俯瞰旭日晟陸海闢
文源生民共涵泳

明月

明月不自照漫作地上雪不照蒼天心照我多顏色天

下一月明美人何相隔
靈波許我浴好花許我折
滂沱淚沾血蹉跎望明月

黃華

有華春不開苦愛風霜節
有根風不栽有子霜不結
華開難及時華落難載色
睽焉涕泗零桃李肯孤潔
西風一萬里搖蕩幽香歇

古意

行行重回首日落天風高
擊黎歌正月曳屣吟離騷
何

當御六龍醉蹴三山鰲一劍絕坤維灝海無波濤

蒼玉軒

綠玉劒拔起翠龍飛紫煙虛簷生爽氣六合涵幽妍老
露洗珠國秀月涵金天蒼茫太古意蕭颯長風前

中夜誦書有感

日月猶不死吾道曷其昏天地猶不壞吾道曷隱淪世
我實相違贅蔓徒紛紛有道復無鳳非時亦獲麟為抱
大人器願歸大人門長劒空倚天安得靜風塵藜糗一

鼓腹布褐還生春曠蕩五車書慙恫一幅中青錢買濁
醪置之老瓦盆一醉南山頽載立元氣根

虛白菴

郭抱大素樸構菴萬物表不礎亦不楹曠蕩含幽杳中
有無名公獨立何矯矯神存一室固心死萬化了下視
人間世汙溷驚擾擾客氣賈餘勇浩然還自小文錦裏
血肉珠璣裝僂音偻僂音褻金宮壓地軸玉觀飛雲杪一朝
等黃土閱世急飛鳥何如此菴中振古一昏曉白雲滿

霜樹老月涵風篠此色與此界昧者恒背遠苟能反身
觀捷徑明瞭瞭無欲觀其妙有欲觀其微即知此菴中
眼界濶多少

義士

燕趙古多豪士其借交報仇排難解紛以義相許固
其俗也丁巳春余入燕得義士人一焉曰晉古跌宕
於搢紳間聲名藉甚故得其為人尤詳初以蚤失怙
恃著道士服杖屨去家觀覽山川交識名右王內翰

白樞判魏靖肅元遺山一時名流皆嘗為之先後尤
喜周急援難凡孤弱頓躓莫能自致往往賴之以濟
一日挈壺酒踵余門而求詩余素喜奇節士聞其梗
概尤有激于中焉乃為之賦詩

嶷嶷一義士能激壯士肝燕市忽相逢布褐春風寒謂
余欲赴難白刃色無難義烈我克舉鴻毛輕泰山嗚呼
世道喪私智忘厚顏苟復蠅營青天井中看自救亦
不暇碌碌長辛酸為爾舉一盃萬古高風攀會與魯連

子把臂觀海瀾

鶴媒

胎禽昂藏姿仙家有高躡堪輿雪月精凋刻為毛骨金
鼎百鍊丹結為頂中物清秋喉江臯圓吭振哀玉時逐
無心雲閒向天邊出弄月過赤城警露晞暘谷還聞綠
綺琴翻翥舞終曲道人庭戶幽滿院苔痕綠春深步落
花天寒倚修竹每惡鴈鷗忍大笑鸞皇俗誰知數澤間
甘為獵人畜反藏媒翳機解發刀矢毒翩嬛舞仙裳著

意親麋鹿左右成犄角顧盼爭血肉有如欺世人長往
謝奔逐木食還草衣緘口復瞑目與世若相望白雲繞
茅屋澹然似無心干戈還滿腹當時王夷甫豈勝何平
叔巖廊高一世危坐翻地軸

鴈媒

雲衢眇飛鴻往來解隨陽序當夜有所次進朝有行瀚
海天山西卯育歲為常八月秋風高雖雖共南翔水國
足汀洲江湖多稻梁晝靄帶殘蘆老岬青草長哀鳴洞

庭月亂點瀟湘霜太和開冰天北去頽穹蒼信禽法天
運斷不為炎涼偶為篝燈誤縛足離江鄉飲啄養為媒
朋儔總相忘嗷嗷解愁人乃反無愁腸弋人見冥鴻矰
繳潛施張置媒使號呼投網來搶攘奄忽一舉盡羽毛
皆摧戕厭然束縛去又向雲間望嗟嗟罔民徒詭計不
可防被獲反為用竭力如鬼蜮有信復無智終自為身
殃誤已更誤人不悟真可傷

三臺

飲馬清漳曲看山上三臺爾來一千年平地猶崔嵬當
時兩京荒鄴下王業開竊國深規模根基重栽培藻幹
壓太行半空丹碧堆氷井極高寒金虎何雄哉銅雀中
天飛醜毒澆鬼魁兆已成鼎足浪戰端可哀諱死著死
欺涕泣效嬰孩分香儘遺臭臭腐不肯埋笑殺歌舞人
兩耳生青苔舜禹纔二世漢武尤雄猜公卿皆負土殿
閣磨瓊瑰忍死待仲達痴騃真堪咍誰知篡國臺即是
亡國胎美人為黃土西陵等寒灰把酒憶思王山影青

滿盃高詠朔風詩日夕鴻鴈來

書羨里祠

周德奕世修殷道屬不競陋哉一抔土欲以厄大聖人
衆方勝天故使俟天定聖乃先天作靜幹造化柄六畫
出象數萬世立龜鏡終亦有天下羨里安足病後來僭
偽者視此驚盼矐為王以不死瞰鼎窮恣橫隨得亦隨
失肉薄還骨併何如會茲理在德不在命

去三汊見太行

二年大河間曾次涵餘浪身與天根浮決漭隨下上靈
槎杳虛舟顛倒泥底樣恍疑渾沌初溟滓天水象揚鞭
得西歸瞠目為一放舉首見太行逸翠蜚萬丈爽朗肝
膽張豁達氣宇曠真宰聳奇骨頓覺天地壯茲山自佳
色何乃氣凋喪吾家在椒嶢老霧橫莽蒼松楸日樵采
山靈亦悽愴何時鶴髮翁攜我躋疊嶂雖無錦繡裹粗
著文彩狀山河表裏全自古更霸王于今何索然死石
徒映向在人不在山先民語無妄行行重行行落日兩

相忘

陵川集卷二

欽定四庫全書薈要卷一萬六千一百十九

集部

陵川集卷三

元 郝經 撰

古詩

曲阜懷古

孔林

泰山元不頽永作聖人墓嶽麓南面馳崛岉勢蟠踞一
從仁瑞止梁木忽生蠹遂成覆夏屋三千各封樹脩竹

與文楷灌聳擁煙霧森森十里林鬱鬱九原路燕人遠
來觀子貢獨不去秦火卷土焚漢雨橫天注本根萬丈
深枝葉四海布斯民賴餘蔭顛沛來比附凡鳥寧敢巢
儀鳳見乃屢緬懷掩袂時重念絕筆句摩挲石麒麟可
惜死不遇

杏壇

天地一生意孔門儘春風喜聞夫子道歌詠各雍容當
時說春王元化開無窮杏壇仁義香不見花白紅庭中

手植檜霜榦參青空幾回比歲寒亦指徂徠松有席不
暇暖木鐸搖西東桓魋怒拔樹仗劍邀其窮回車殺鳴
犢擇木視飛鴻燕居都幾年一世如斷蓬誰知千萬世
遂為吾道宗枝葉今尤多春來花更濃昨朝上丁罷醉
殺守祠翁

顏巷

顏巷無顏徒荒煙亂榛梗奚復辨崇陋淒然想幽屏應
卜原思鄰不與端木竝曲肱儘餘樂閉戶祇退省自有

正大域直造高明境不違獨得仁無欲乃能靜瓢飲忘
萬鍾簞食同五鼎乃令子慟哭天喪不敢請顏夭未為
短跖壽豈為永不貳乃云命枉生特徵倖黃桑千年道
尚有門前井誰來洗心齋無人照止影西風散禽鳥老
雨溷蛙黷

周廟

中城繚危基公宮盡禾黍惟餘文憲廟青松蔭寒礎塼
壇冷香火誰復薦籩俎厥初蒼姬王世德繼湯禹一再

幾遂微管蔡基祿父公旦述聖事攝政輔幼主皇皇赫
東征焰焰顯西土下能開成康上能竝文武禮宗七年
制樂備六代舞更比夏商文不替義軒古公薨葬畢郢
廟食乃在魯宛與大成鄰氣色成龍虎誰知曲阜城即
是文章府

子思墓

王陵象尼山室皇擬天闕白石六十四方正相倚疊鄉
雲繞龍隧修竹生馬鬣前却三代祖宛與聖人列乃是

子思子道貫祖孫一顏夭曾始傳心授相世及大學宏
綱舉中庸性理切浩氣有孟軻六經復為七向微三大
賢聖統幾廢絕爾來一千年晦沒無人說韓李端緒開
伊洛本根揭萬古唐虞心日光目睫不必揮金鉗拜
墓即親炙

奎文閣

新宮拜小寢旋上奎文閣欄蠹紫苔深簷傾青瓦落佇
立思聖人音容儼如昨臨深敢為高犇逸不可學闕里

泰山前洙泗墳林脚道德竝流峙鳶魚各飛躍靈光秋
草沒泮水清霜涸返照入顏巷無人有餘樂舉手捫天
星絡繹光閃爍何時五曜入晃朗壁府廓歸馬掃欃槍
勝殘沉貫索忽聞金石聲殷殷地中作青天有太陽莫
漫螢火爝

遊靈巖寺

乙卯秋九月十九日登泰山二
十二日下太平頂遂遊靈巖寺

岱宗西北馳倒卷碧玉環嶽靈秘雄麗勢欲藏三山初
從谷口入兩崦爭孱顏漸疑下地底細路深屈盤仰視

覺天窄石井攢峯巒陸海沙却開突兀仁主壇桐鯨吼
西風棟宇橫高寒石龍噴清泉灑落几案間脩竹掃山
色瑩綠穿雲根丹鳳饑不來寂寞青琅玕上方在天上
下視無塵寰空霏鎖霜樹翠錦蒙朱殷西日回清輝輕
金滿煙鬟何時脫世網掛席高盤桓靜境求初心滯慮
驅萬端向晚蒼烟合更欲窮躋攀路斷不得前矯首重
一看

贈青社諸公

北風吹海氛雄鯨偃修鰭

音奇

皇皇擇木鳥落日將安之

青霜摧豐林枯沙沒卑枝
況復天地閉豈汝飛騰時
嗷復嗷嗷途窮愈多岐
寸心增鬱陶拊髀潛生悲
蒼茫欲問津謾使行人嗤
賴有魯連子亦在東海湄
舉手謝浮世共欲尋安期
扶搖三山巔笑傲雲濤低
半夜開扶桑弄日騰清輝
伊昔孔尼父亦欲居九夷
世網儻可逃去去夫何疑

青州山行

薄遊東諸侯致敬多擁篲訖無安巢木歲晏復反鞞飲
馬南洋橋摩玩米芾記蛟龍郁蟠拏劒戟磔芒刺酌別
表海亭漱滌吸空翠霜風吹鴻鵠草野簇車騎日斜過
雲門凌跨方半醉垠嶸亂葉滑蹭蹬幾欲墜懸壘半遏
面絕澗黑無地入險難遽止眩運不敢視層崖宿山家
坐久猶膽悸居民畏馬嘶遊子喜犬吠汲遠終夜喧月
斜人未睡柴闥見星稀枕石餘蘚膩酒散身逾困飢透
食有味忽聞炒椒巔虎去失羸牸陰森木石怪慘冽霜

露氣黎明轉重崦呀互急幽悶繚繞天一線陷日孤光

細嵌隙深且蒼白晝悲魍魎過午纔得水飲漱解鞍憇

却是城西河山間更清駛彎環折鱸腸詰曲亂之字跋

涉重趺

音遂

步深淺頻揭厲林開見石田數頃牛角銳淳

俗久深居見人但驚避農婦帛纏頭應門聳高髻破屋

有村翁無言但流涕舉鞭為撫摩俾說山中事都因七

十堠鹵莽各稱帝實戶三百萬食盡猶未弃白骨與山

齊查牙誰與瘞幸得脫齒頰瘡殘餘一臂年來立海州

遺噍更疲弊邊郡增仇敵深山無子弟聞此不忍聞愴
怵復嚙齧海岱稱東秦山河號十二峽口吞穆陵渤澥
卷無棣初從霸國後往往逞兇獍號公死巖邑特制殆
非計祇為殘民區每啟姦雄志窟宅多龍蛇桃源難避
世數日出脩阻川途漸平易雲梢見萊蕪孤城隱霾曠
回視青萬疊乾坤屹軒輊穿出過徂徠背轉逾汶泗泰
山正面看益見崇高勢目中好全齊蒯生莫兒戲為告
慕容超勿謂燕得歲

界牆雪

不用體物字昌州北
金人所築界牆也

陰風簸長嶺坤倪忽軒豁
嶙蠢生鐵雲黯淡死灰發
初來雜沙石硬顆傾碎雹
旋轉迸玉屑一噴勢愈惡
勁發萬弩齊激去掣箭鏖
鏊委積皆重搭背左著點
剗道緊不暇飛滾滾互團
拮蟠空凍相粘連締渾欲
閣漫天都一片奚計席與箔
何處覓界牆人間無海嶽
顧盼已數尺氣偃驚駭愕
慄慄寒作威稜稜痛如斫
模糊半垂面酸楚欲折脚
我馬不得前我僕指已落
重繭頓覺輕透骨

如紙薄挾纊殆兒戲豐貂亦纖弱向晚耦陡黑陰雲肆

饕虐橫空怒潮頭壓地塌天角平拉老鼠山倒卷鴛鴦

灤刀掣走柔然金鼓鏖衛霍竟夜遽呼號乾坤碎磨錯

車從谷口沒人在冰底晝黎明遞相尋堆阜各挑撥還

聞頓足歌彎弧盡欣躍正好射黃羊何須待消鑠長嘯

蹴踏去天沙蕩寥廓聲繞霹靂絃查牙競禽縛平地深

虎穿更不用矰繳瀝血嚼紫肝流澌飲紅酪雪盛馬尤

肥皇天助幽朔資賦不畏寒自得生處樂可笑羸秦初

更嘆金源未直將一杯土欲把萬里遏隱牆日避冷手
弄不龜藥救死恐未能奚暇更守捉况乃天道北斗極
重旋斡黑雪是長安飛灑過汴洛突兀無與強萬古入
陰壑為告党家兒惟當守盟約君看銷金帳豈是疆戎
索

獲鹿新居哭元遺山

殘山遶荒城慘淡帶餘雪我來問新居欲語還哽噎搖
搖識風旌掩掩淚隱睫額地升中堂痛激肝膽裂鼻若

閨闔風幽冥忽穿徹空牀一束書不見文章伯愁馬暗
不鳴老僕頓欲絕嬌兒背面啼高弟展轉說有書未絕
筆有傳未卒業靈輒已西州壯心空北闕緬思從公遊
灝汗飛玉屑振筆青雲開炳烺寒電掣鯨吹濤山回隼
厲霜鋒擎蘊情入軟語婉藹幽更切鶯啼柳陰深百轉
春不歇方張大庭樂誰意成永別徙倚扳庭柯窻戶轉
寥寂乾坤入凋喪衣冠少顏色魂來暮山青魄去暮山
黑城頭老畢逋底事悲破月中腸元易感使我心欲折

登昊天寺寶嚴塔

旭日燒銅輪赤氣繞車轂平步登青天陸海一龍窟寶
藏沙劫開突兀翻地軸瑰奇入霄漢締構窮土木高穿
翡翠籠直到蓮心出錯落金鯨鱗蹭蹬木虵腹致身知
幾層但覺重錦束巧碎彫鏤心力盡撐拄骨合沓三天
神倚疊萬國佛丹青雜珠琲新若手未觸盤盤老風煙
天門鎖寒玉乾坤一柱旁日月互生沒六年五入燕空
為眼中物于今始一登頓覺超凡俗曠宇凌高寒飄飄

肆遐矚海卷碣石回天壓陰山覆瀘溝一衣帶居庸險
何足蒼蒼金臺雲青青薊丘竹昔賢今不見悵望空注
目下視極羽淵黃熊尚盤屈窟宅幾千祀潛姦富凶毒
魑魅不能禦何人與驅逐燕雲割山河神州疆理感稱
臣又呼父萬古天王辱一登還百憂慘淡意回復安得
脫世網對此傾醺醑慷慨澆心胃醉向天邊宿

贈劉茂之

昔歲余先子辟兵淇衛間久雨壞垣壓其腰股懣絕

不知人者數日醫者以良劑飲之而愈甲寅夏故疾復作號呼晝夜殆不能堪全真者劉茂之飲之以藥便血數斗而愈丙辰夏得風疾而小便結塞十餘日臍周左如覆盂狀醫者殫技莫之能淪茂之視之曰是針不能達藥不能及有一術可愈乃以手按摩自章門至于氣海頃之血溺并出出數斗乃愈先子生平疾病者三而愈於茂之者二是先子數年之命茂之延之也茂之滿城人名至臨嘗遇異人授之方技

而不自售遇有疾者哀其苦而閔其窮即為治之無
不愈顛連無告者日塞其門而不憚也雖為全真道
而喜交遊灑落通敏不滯於物曾次洞豁廓無梗礙
而其蘊蓄有非凡夫所能見者余喜先子之事且嘉
茂之之為人乃為賦詩

道進物我化技進心手忘飄飄子劉子道技皆所長委
世欲長往顧瞻仍彷徨吾民吾同胞顛頓真可傷以道
引汝年以術藥汝瘍生死且肉骨下手開膏肓譬如庖

丁牛游刃不折芒舉目皆全人仁壽涵八荒惟天畀先
子兩厄皆再康晏景回桑榆庭戶生輝光我欲借君術
醫國還虞唐彷徨張四維突兀宏三綱緬思何可得謾
自摧肝腸山林有高躅注目煙霏蒼何當把臂遊深探
先天囊

隨州

山南楚甸圻漢東隨為大盡日涉艱阻極力出險隘川
途落木杪忽覩天宇快長林偃秋色百雉露茫昧疑向

遠水曲隱映脩竹外捷去不得前橫亘斷崖礙煙深梅
欲春石亂水相帶飛鳥不知人投樹聲甚怪探騎隔岬
言轉出西城背火壕削紫土斬絕黑欲墜當時不受攻
倒與安陸潰居人盡室去涵養儘一敗荒空二十年繁
夥日蕪穢白堊餘屋壁狐狸窟庭內穿窓棗枝曲倚柱
巖挂壞誰種當道棘亂長侵階菜奧室沒蒿萊何處覓
粉黛溼氣雜土腥當晝半暝晦相國來秉鉞下令急剪
拜佇馬開天荒欲復太平代勿謂少師侈今有季良在

石門

霜風赭諸山重崦黃櫨映東南漢川盡萬疊複嶺亘甲
士斫前路呀轉崗坂競登天忽落井急注繚一徑翻身
伏馬鬣植立上石磴覆地露葉滑擗面樹枝迸斷木餘
高盤蹶步復拉脰植竹磔青耳剗刺蹄血凝石梁僅尺
許絕澗陡色暝萬衆急相擠失脚如墮甑前抵雙石門
扼塞兩窟丛不虞為申驚傳呼空谷應大洪宿重兵栲
栳相盼矚木蘭與白兆左控復前迎漢淮此要害敵人

必來偵部伍各整頓介冑聽將令遇敵毋妄動涉險更
安靜如律以次發不鼓氣益盛崎嶇得隙地稻塍土脊
硬匍匐扳劒刃湏洞下泥窅回看半天乾却欲上危徑
日斜布營壘煙起衆已定反思中原好桑麻展平鏡沃
衍少巖邑生民樂王政驚熊文王師南服始數乘後來
為霸國春秋每譏評一州七千里蓋亦賴形勝六朝據
上流踵武反朝廷吾欲問楚人于今更幾姓

白兆山

旗尾拖澗雲鼓行斷橫谷敵人隔林望坐甲不敢出白
兆有居民煙蘿蔽喬木負擔來迎降馬首爭蒲伏為聞
不殺令又復治安陸萬死乞餘生焦土覓舊屋老人翻
白鬣南望吞聲哭松楸却成林到此死亦足載說桃花
岳醉墨苔蘚綠每於秋月下似有飛僊讀遽令巾其巔
重為賜米肉偏裨好護送縱歸不令宿喜氣動江山迢
遙肆遐矚安得與李白雲窓對脩竹

雲夢

羣山避鄢郢霜淨楚天遠秋色浮鴈背風水蘆花滿陂
澤通江湖田岸藏町疇橫匯淵藪大散漫稻畦淺積煙
晚翠重老浪虛白卷乾坤入涵混魚龍深宛轉殘嶺土
崖斷餘浸黑壤輒平崗繚中洲濶甸負長坂勁竹密如
簣綠粉封紫筍忽向青楓末半出黃檨峴北人有圖畫
却向此間展選鋒一萬騎掣電鐵滿眼更不顧鹵獲直
向腹心翦昨去今飲江埽道草盡偃何處仍三戶踐蹂
殆不免荒莊自池臺寒蔓相挂罥鵝鶴不知家悠悠忘

還返注目浩無際
馳想首重俛何時
結茅屋老吟寄殘
喘濯纓謝漁父
瞑卧汀沙晚

青山磯市

渡江不殺降百姓皆按堵
羊羅到武昌相望兩舍許
井邑聯亘長橫斜纏水滸
青山一聚落中道勢幽阻
通衢萬家市巴商雜越旅
背面千檣洲漢陽對鄂渚
絕岸斷鰲立崩濤高崒吐
竹樹深且密石頂還戴土
傑觀復傑出層楹瞰全楚
薄暮重登臨道者貌甚古
開軒具盃酒

江氣滿樽俎萬里西風來飄然若輕舉

壓雲亭

重嶺繚郭峻高亭下臨鄂艤艫斷江流甲騎蹙城脚拒
命始進攻鐵匝長圍合額已無頭陀徑欲推黃鶴謁王
登巉巖再拜瞻日角王氣壓江山曠朗天宇豁十月汗
沾裳敷奏初不覺詔賜金叵羅禮酒焉敢嚼絲綸重開
喻滿面春風著撫膺還自頌不負生平學須臾動金鉞
猛士徹虎幄龍起皆雲從青山萬馬落

黃鶴樓

江漢天西傾斷岸感寒雪石城踴高樓瞰臨勢縣絕雲
夢吞八九沅湘在眉睫層軒掩石鏡更欲壓大別千帆
落山巔萬檣擁舟楫中天卷晴嵐不與人世接縹緲多
飛僊超搖有遺跡前岳黃鶴來重與添顏色丹梯插青
空萬丈生金碧聞說呂洞賓題詩滿新壁至今起香霧
恠字人不識仙語龍蛇亂醉墨江山溼有時橫長笛吹
落漢陽月洞庭與彭蠡一聲勿穿微我方溷戎馬對面

兵塵隔焉能載酒上雲間
覓僊客當年禿髮翁幾回喚
李白不見狂處士亦為重嗟惜
高賢共長往矯矯不可得
落日聽江聲西風冷蕭索

渡江書所見

已未秋奉命宣撫江淮自鄧南入新野
蹈宋北鄙渡泌河及湖陽入于春陵
陂塘聯絡畎澮縈屬村墟
翳翳荒空不可行
佳木脩竹竒花異卉
擲比林莽間
怵然有感於中而取野蓮
荒竹秋桐野菊四者姑以寓

感焉

野蓮

陂塘渺煙蕪秋波淡浮空蒹葭雜芙蓉依稀見愁紅輕
銷露華涼亭亭倚西風金粉亦自香霞腴為誰容無言
恨最深失偶情更濃搖搖似相招為喜詩人逢翻思彼
桃李反在羅綺中復憶巖下蘭綠葉翳荒叢西子出亭
羅原思老蒿蓬萬物在生處莫謾仇天公

荒竹

荒竹遶廢宅高下隨女蘿新梢入林莽迸葉揚條柯玉
骨清且癯埋沒還奄阿病綠煙慘悽枯黃雨滂沱劍斷
戟復折壯士空悲歌伊昔主家安森森氣相摩籜龍起
雲雷平地煙霄過幽香澹庭除靜陰延綺羅一自兵塵
生人去斤斧多寂寞秋不實飢鳳將奈何

秋桐

高秋江漢波卉木入搖落荒林擁孤桐蔓草重繞縛淒
迷氣日喪憔悴葉自脫黃凋晚風吹青裂饑鳥啄無時

亦無儔幢幢老陰薄儀鳳安所棲宮樹空寂寞謂汝無
自傷植根亦嬌弱豈能持風寒況乃失所託何時此焉
居揚鋤翦荒惡攜幼攀庭柯遂我生聚樂

野菊

乾坤入消數萬物呈晚節秋晏菊始華荒叢翳林樾野
迥幽姿清岡斷寒艷接絲蟲胃青苞啼蜚抱枯葉瀼露
積玉華層層擁金屑我欲摘以杯飲之濯中熱霜栽郁
高標胡與荒穢列嗟爾夷惠儔玉質難變滅不謂無人

看便使幽香歇
安得老瓦盆坐對澆古月

陵川集卷三

欽定四庫全書薈要卷一萬六千一百二十

集部

陵川集卷四

元 郝經 撰

古詩

渡江書事

朔龍蜚冰天瀚海開日月萬國入尺箠海外迄有截東
南天一隅區宇獨限越我鞭莫及腹我車莫通轍阻山
還據江深遠極亘絕桓桓天策王建旆秉鈇鉞睿衷推

深仁不忍遽翦伐弘霈縱俘囚下令明不殺威銳極晦

蓄龐恩肆霑洽彼乃執信使

謂令旨所差
張天鐸也

徼鄙闕偷刼

本以禮義期誰知重驕跋王乃振師徒揚旗禡太白東
西兩距海百道相綰結幹腹出大理上流下開達夔門
勢扼吭通泰潛擣脅萬里常山蛇首尾勁相接八月馬
首南王氣快軒豁千麾繞清霜萬蹄碎踣鐵高天四旁
開厚地一道裂西風楚山空豺虎皆遯跡驥怒憑風嘶
一噴飛亂葉羅汎覘江津輕舟詰朝發清波乃舒徐大

浪還妥帖中流笑前人浮梁與荻筏白魚入王舟瑞氣
浮桂楫曾莫一矢遺諸軍報鱣捷談笑過江東兵刃渾
不血居民盡按堵王師有成法駐軍武昌南威聲轟霹
靂申令仍緩師大衷有餘恤彼昏還犯順投袂安可及
文物三百年衣冠本無敵誤國不知罪虛文猶論列誣
以敗為功負以勝為說欺君還毒民何以救破滅右師
滿湖湘左師溢巴峽江潯連大屯淮南擁驍甲當朝大
冠我于今有何策外勝常以力內強惟以德乃今并棄

擲本拔原自塞伊昔澶淵回信誓始寧謚詒謀燕翼子
海內日富實中年或生虞南北動疆場鄭公慷慨姿開
心見肝臆遼主亦為動相視指天日竟無海上盟二帝
終失國後來秦太師始悟前王失尋盟息干戈好聘堅
金石百年享安榮而反加罪罰經術日窮奇國論甚迂
闊賢王本寬仁於彼欲存活而乃極擯蔑激怒爾何益
嗚呼天王統紀綱萬世一文物與禮樂百代更累積一
朝遂塗地吾民作何物厲階大江流天地限南北兵爭

無時休血與江水赤混一纔四家千年儘戈戟何當斷
其流舟車到南極

宿汝南道院

虛庭淡黃昏折梅見新月徙倚為長吟幽香有時發枯
葉鳴衝風花間動殘雪悠然憶故山風塵信音絕矯首
天一方踈星鴈聲噓

浮山堰

斷磧呀石絕長亘青迤迤蜿蜒繚彊蛇鑿罟橫齟齬淮

流從天來撇捩過一矢氣怒猶不平直欲卷遺趾蕭郎
真耄期見性不見理日暮乃倒行平地成涪水赤子生
魚頭百萬並一死雖無殺戮名亦與挺刃比麴牲及菜
果小惠徒自喜梁宗不血食餒鬼未報此侯景登明堂
降罰亦天使哀哉無辜民朽骨在餘滓霖潦秋煙深煩
冤掛踈葦淅瀝生悲風慘淡動遊子白圭壑鄰邦遺誚
今未已水可亡人國斯言厲階始為報移山人愚叟真
愚耳

冬至後在儀真館賦詩以贈三伴使

突兀天壤間洞視及八軌區宇入割裂疆場更彼此閔
怒尋干戈禍亂無期已孰能著手援下石往往是予方
閉關居不忍安坐視復有弓旌招颺然為時起仁義一
萬言麻鞋見天子天道本好生天顏亦為喜乃曰哀吾
民去殺兵當弭今日踐阼初急務惟爾耳三人奉書行
一信盈尺紙詔下癡老泣春風動田里入境及淮孺肺
臆卽開披剝薙撤藩垣羅列倒瑚簋萬變惟惓赤一念

無倖詭白虹晝貫日清江秋見底行人不能行在所輒
頓止一自入儀真改館七牢美坐使庖丁勞徒增魯連
恥空庭重咨嗟閣室還徙倚蹉跎兩朝事慘淡一江水
堂上接玉帛何如四郊壘萬衆七奔命何如一行李新
陽復生意歲律已窮紀節候中易感挺特入飢餓折梅
愧皇華對酒生顙泚蒼生苟能活志士豈惜死願借君
懸河發我弦上矢天下本一氣南北只一理處置一何
難鴻毛扇糠粃中原帝高光遽可遼金比君家祖宗法

親仁載良史可令富鄭公樹立太平址一若泰山安一
若九卵累事幾或一失千載貽詬訾中間樂禍徒沮遏
逞姦宄以為富貴鎡礪鼎磨血齒高天無風颺側佇羽
翮俟激怒起兵端馮鋒肆蛇豕皇皇仁聖資比復當謹
始發言謾盈庭執咎誰敢爾是非在目前胡為眩紅紫
政如道傍室牽制終誤已區區謾多議紙上何足恃出
門懼垂堂何嘗見邊鄙睽孤還自睽見鬼急張弛一斷
即遇雨羣疑皆披靡天運屬安治何當合離此不能鷹

脫鞵還成肉在几盤殮寧忍食欲斷南八指

儀真館後園感春

深庭日清亮卉木欣東風冉冉蒼翠香過雨溼青紅天
葩擁纖妍膏沐誰為容蛺蝶太放顛百匝遶幽叢自謂
擅春色豈知吾汝同一夜落花深綠苔香錦重我來藉
醉眠仰而聽遊蜂悠然發驚省桃李不如松

繁李夜逾白條楊先時青春深百草長薜蘿滿空庭生
恨復喚愁况復聞啼鶯心事觸處傷有花還無情朝光

紅露晞暮色紫烟晴新燕嘲春梁歸鴻眇雲聲何當理
舟楫麗日清江亭

風花點白紵香露滴清晨幽樹靜益鮮虛庭寂無塵亂
草繁階除蒼苔老餘春鳥鳴墮紅英蔽蔽著襟巾翠碧
挂黃棠飛去誰家鄰陰森現畏景綽約逢花神回首碧
雲重紛紛擾天真

三月花更愁一雨香百和綠英堆狼籍紅蕾愁亦破冉
冉物花暮紛紛蜂蝶過幽事關心深愁來藉草坐春去

酒樽空尚有餘花墮世路足速遘人生多坎軻徙倚盼
殘柯吁嗟果奈何

幽蘭三件使致蘭二本感而賦詩

春山好鳥鳴淑氣扇芳樾林深草野迥宵與人世絕猗
蘭郁幽姿心馨忘目悅薈薈祇自全荆蒯甘與雜靜深
反致寇輕風遠香發虞羅斷芳根逢諛李桃穴本非華
堂姿衆卉同寡握不逢汨羅臣又失長沙客上官增青
蠅鄭袖逞顏色薰蕕臭自長瀟灑煙霧質竭來偶相看

慘淡初未識却疑子羽寢三嗅清香泣坐久忽目成江
雲滿窻白重吟遶雙叢一花還一節青金呀鳳嘴紫錦
卷驚舌我欲紉以佩愛重不忍折呼兒課楚詞諷詠思
比德所貴香不淫時至酷清烈所恨失所來好玩反爾
賊何當煙雨深還山種明月

橄欖

南人謂
之格覽

南菓足韻勝北人罕為奇銀盤獻青子愛玩驚見之蓮
房飽出蜩裹滑生下枝翠粉苔埽音新清烈凝松脂齒

牙噴艱澁苦硬不可持氣韻久始來靈根淪天池灑然
凌青飈甘露濡仙芝有如宿瘤妻苦節真可期亦如相
韓休朕瘡天下肥危辭遽逆耳終自為良規先難阻欲
速後得卒莫違默默心語口此樂夫誰知始覺衆果俗
橘奴復梨兒海嶺瘴天黑異味翻茶飴雨露存天真颺
霧不可滋島嶼出乳泉造化亦若茲元氣舌本甜酸苦
歸涕洟本來甘受和衆味相假移居然復其源偽妄焉能欺
何當謝世網兀坐忘奔追深山石室空煮石療調飢破

鼎煎春芽嚼此吟
湘纍條然沃肺肝
看山坐支頤物表
有真味載歌采薇詩

秋思

星麾重霜露落月
窺弊裘久客心易傷
况乃逢暮秋誰知
楚江邊即是窮海頭
赤子解虎鬪先拚十二牛
太阿授楚柄濤塗竟拘囚
昊天有肅殺未肯休
戈矛書生本迂闊
國計無身謀俯仰
但不愧萬事從悠悠

燕南二十年閉戶
鑿混沌先天探首尾
立志極排憤衣

帶歲不解彊勉忘怠困落筆一萬字開卷即立論不知
世代遠但覺聖賢近學問期有用匡濟展底蘊微車賁
丘園蟄窟驚一奮使行還尼止江邊坐孤悶

江聲萬馬來勢欲衝夜枕志士足多感坐起安得寢靜
聽風雨急透骨寒凜凜湖湘湊遠浸巴蜀動餘念誰令
限南北汹怒欲相詗落落弭兵心于今成貝錦薦玉期
捧盤墮甌如拾潘樽中有瓊花明朝且轟飲

木葉墮積水西風白鴈來祇應破月底曾過黃金臺昔

年弔荆卿臺邊把酒盃落日督亢陂莽蒼秋雲開浩歌
易水寒晚山青崔嵬誰知坐江館兩見飛鴻回空庭日
徙倚慘淡生莓苔援溺先墮井計拙良可哀

弱冠燕市遊許與皆豪英百匝紅錦圍酒海橫長鯨醉
倚薊丘竹長嘯秋風生有時按策坐談天復談兵劃破
天心曾四座一時傾今來閉重門但聽擊柝聲乾坤惡
喧聒竟歲暗不鳴何日九地雷決裂重一轟

昔游東諸侯秋晚登泰山佇立太平頂超然出塵寰日

觀望吳越浩渺秋雲閒長風漾江海天末生微瀾今年
坐舍館江聲滿重闕却如在幽陵脩阻不得看好花靜
有色相對婉且閒無由寫哀怨日遶歌幽蘭

儀真館後園海棠兩花于秋因為小酌賦詩

二年海棠秋幽妍對寥索霜後輒載花枯株吐纖弱化
工為詩人故令造物錯木落出奇芬風度亦不惡尖黃
簇短葉膩翠光欲鑠感縮包紅栗殷濃入深萼稀疏生
意怯靜麗尤綽約飛絲冒青蟲蠨蛸共聯絡深閨養春

嬌霜花滿珠箔，賴得西風輕微薰。小陰作盈盈出宮妝。
新寒翠綃薄，空庭自顏色。含恨誰附著，息亡楚無言意。
婉心不樂琵琶怨，昭陽所遇非所託。獨有未歸人相看，
慰孤酌。却似海南時，坡仙政漂泊。有酒仍有花，世事且
高閣。後時亦何遲，適寓今猶昨。香霧霑新橙，傾酒兩螯
嚼。銀燭更高燒，秋花易零落。

甲子歲後園秋色四首

鷄冠

夷則播新律卉木協秋候綰結流火餘的礫金天宿嵒
嵒列庭除摘摘儼雄秀炎帝朝火官絳幘軒宇宙植立
竟不拜離披擁青袖奕葉初類覓吐心漸如豆脉絡引
絲起一片珊瑚瘦雲芝茁紅腴紫茵卷翠脰碎顆感丹
砂肉綻殷血透怒割赤龍耳勁礫還亂糝麻葉薄且聳
山字缺乃覆查牙欲成角擁腫下連珠生全餘小穗展
盡帶殘皺昂藏偃膺高突兀出羣驟還將早霞映欲向
朝日睢月露終夜棲風雨幾回關再礪復自止交退誰

與救區區閒草花象物與接構弭兵日觀戰亦是自貽
咎垂簾且相忘高枕卧清晝

牽牛

野花照天星星中花亦盛長夏蔓草深疎籬掩斜徑幽
庭日無事森寂澹相映繚繞絲亂垂點綴葉相並金風
一披拂零露光彩競參差碧玉簪綰插滑欲迸霜絲吐
冰同容色好娟淨堂陰青錦張牆背紫苔瑩時方鵲橋
成佳節當秋孟織女能翦裁天河洗尤稱女以秋為期

朗將花作證風雨開雲屏鸞凰鏘月鏡處處乞巧筵家
家喜相慶五年江館客萬事成墮甌不能致龍節空自
悲虎穿永日鑒炎蒸中暑甘卧病對花淚盈目坐起不
覺瞑雲漢見雙星回頭看斗柄遙憐小兒女昏嫁俱未
竟中流虞風波相見何日更

葡萄

深院荒草長短蔓裂埤縫葡萄本西果南國誰與種插
蘆為扶持灌溉甚珍重瘦骨紫節舒龍頭青線控蝓蝓

上疎籬舊舊將遠縱遭遇雖後時取實望秋仲摘露添
俎豆庶間館人供誰知六月旱卉木焦死衆斷秧餘幾
花勉強著土擁竟作纏結枯日遶空悼痛肺渴口重乾
望梅心欲烘忽憶河隴秋滿地無歇空支離半空架串
草十里洞拇乳積城岸瀕濃接梁棟一派瑪瑙漿傾注
百千甕往歲見沙陀回鶻正來貢詔賜琥珀心雪盛瓶
盡凍查牙飲流澌氣壓黑馬湮一旦離魏闕五載猶在
宋見此復何時鳥道目逆送

野蓼

窗地蓮蒲短久旱餘淺淤牆隈積餘埃玉鳳秋不翥野
蓼根莖堅幸得侵沮如節葉瘦且赤薜蘿交翠箸細藥
亦鮮潔粉米糲丹素獨窳裊輕穗離披滴清露水花澹
晚色幽杳足真趣忽憶過夢澤千里渺煙樹蘆花與蓼
花露錦蕩雪絮深入芙蓉藪遠映蒹葭渡舉鞭問飛鴻
駐馬嚼佳句乃今四壁中浩渺隔煙霧日斜對幽叢聊
以慰遲暮大似辛苦蟲無復風標鷺來因援沉溺底事

極幽錮屢上剗腸書無地瀝血訴嗟嗟好花草焉用生
此處祇應為詩人故故獨不去嘗膽如啖蔗食蓼猶饒
御仰首但有天志節久愈著

新館秋懷贈正甫書狀

桂香動幽人秋草滿高牆縞袂臨西風佇立歸興長羈
翼塌卑枝冥鴻恣翱翔南山豈能移愚叟不自量嗟爾
違慈顏從余使炎方亦欲登雲衢逸足馳康莊誰知成
阻脩按劍看夜光遂生肘腋變梟獍為禍殃顧惟仁者

勇臨難志力彊繾綣百折餘奮義肝膽張吾徒其能人
玉石焚崑岡所幸書幣完舌在身不亡老雨洗新屋情
話對空牀從渠讒口壓貝錦生鋒鏑誣善祇自欺謗毀
痛何傷昨宵燈火新月落霜露涼載續所著書靜默窺
天藏槁茗煮黑水數椀澆枯腸楚騷不必歌仰卧看屋
梁行止有天運得失理亦常道能全始終終得拜堂堂
烈士吟贈總領宋琚

薄俗敗風節有志亦中改舉世遂無恥逐利甘鄙猥或

有申張愆難免市道買幾回惜魯連重為嘆朱亥襟期
何灑落高義冠千載寥寥復誰繼碌碌等駑駘南北久
拏兵吾徒著手解救鬪乃搏檄陷穽生蟲豸歲久或竊
發亂刃期俎醢烈士有宋君王事賴不壞賊中偶拘隔
凜凜畏英采慨然自拔出喜聞官長在館吏誘令降不
語首重擺中宵出儀真五鼓入淮海羈留故箱逼難耐
冀自悔晚柱欲碎首守者盡惶駭大官遽稱謝下拜貌
磊磊遂陳稽遲故勸令更延待方說在諒陰便對有家

宰彼知辭理屈我乃意氣倍顧盼立功名足以起庸怠
君當持此心吾亦重自罪春風波長江佇看振旅凱請
鉞雪主辱為國清大慙

新館八月三日雨

氛祲積穢沴旁魄宇宙滿驕陽鑠洪爐豎電繞新館輪
囷潁雲擁決驟白雨建迅雷初啞鳴缺裂蟠空遠猛風
忽著人潑目氣即偃光恠入肝膈勢若山壓卵柱天金
塔碎奮地火旗卷連閃復疊擊黑海共旋轉群龍破壁

飛驚浪拍戶翦大舟千斛翻空車萬乘碾夜久怒益甚
喘喘懼難免僮僕儘顛頓覆面不敢喘牀第等階祀無
復辨深淺記異古未有大變見亦鮮祇應和龍氣突兀
揭幽顯都將生靈恨六合忿一聞蠢爾禍國徒聞此無
愧覲

新館春日書懷

天末聞春鴻梅梢見新月孤影獨徘徊踏破牆陰雪寂
寞未歸人慘澹無家節異域機穽深中原信音絕白壁

一片心青天竟難說誰將萬古恨總付江城客

歲華雖云改突兀祇此心弱質乃重負第恐力不任走
馬活斯人覆舟成陸沉饕牢耗將竭變故日益深東風
吹江聲曉日晞鳴禽從今桃李花又是夸園林

鵲鵲下空庭飛鳴行且搖飲啄還相呼去去仍相招我
有弟與妹江山鬱迢遙膝上讀書時中堂拜母朝鵲雛
遶竹花翡翠巢蘭苔衝風吹雲衢兩處聲嗷嗷

二親連夜夢慘戚異平日祇應節序改思子不忍食覺

來淚滿枕肝裂刀斧劈熱紙死灰飛酌酒霜階溼遙想
墳前土歲久深荆棘忠孝兩未盡愧恨空飲泣

怨入江流深恨與春潮上天涯獨昂藏顧盼空俯仰誰
知誤國徒解結漫天網不漏一民命赤子驚攘攘徙薪
重獲戾擲矜乃加賞笑殺伍子胥黃池尚爭長


舉杯對江梅酒面生春香一酌酌上元再酌澆新陽自
勸未歸人一詠復一觴中原帝仁君突兀恢皇綱緬思
好生心此去不可量自昔有天道我本無愁腸

丁卯孟春新館望南極

八年坐江館祇得片天仰
厄運連連遭乖氣纏魍魎
白虹貫黑日彗孛掃穹壤
神風忽吹出新屋眼界廣
前秋老雨餘霽色開莽蒼
參足玉井東去地都幾丈
潁星隱江氣焰焰光欲長
老人慰羈孤驚喜意惚恍
都疑夢寐中恠事非所想
誰知今年春更比往歲朗
黃閨對天狼數日見乃兩
恨無雙白璧薦幣展覲享
中庭望不盡謾為拜稽顙
南海還無波北辰氣尤敞
中原帝聖君太平

今有象整頓高世策道泰非技癢

陵川集卷四



總校官候補中書臣吳紹灤

校對官助教臣卜維吉

謄錄監生臣戴珎

欽定四庫全書薈要

集部

陵川集卷

五至
七

詳校官助教臣謝登雋



欽定四庫全書薈要卷一萬六千一百二十一

集部

陵川集卷五

元 郝經 撰

古詩

幽思



江山鬱幽思靜止有天光宛然褰薄帷明月照我牀蟋蟀鳴孤根鴻鴈顏飛霜怒怒動羈束耿耿發清狂有萬來無端百折縈回腸晤言且伏枕一寐成兩忘

搔首視天宇幄幕四垂碧道窮誰與言迢然坐孤石默
默心語口冥區扣虛寂老鶴翩然來聲帶江皋溼偶與
成唱和玉振動肝臆感寓遂無窮亶亶參元極

性天入無極窅窅觀化初渾淪一活物極盡都無餘乾
坤藏首尾坎離互根株擺拉屑磨齒出入軋戶樞遂生
無量人乃有萬卷書總萃成六經所以為吾儒

衆動劇藏蓋獨覺還發蒙揭焰開熒臺赤日凌青空宇
宙一蔀屋至明元無窮但見人物異誰知地天通君看

九泉下景曜皆燭龍昧者烏可言耳目真瞽聵

有物與生俱混涵具萬象昭昭為吾天皜皜不可尚妙
合元化精屬底更無上澹然入虛明大惡滋意匠如何
窮竒徒穴蠹肆豪彊胡不觀其生未死先自喪

天幾為身樞轉幹主性情靜定得其正焉用巧與營化
窟每雕鏤焜耀開萬靈偽妄相治陶螺羸為螟蛉反觀
心地初周匝惟一誠莫漫彊作為無本竟何成

吾身眇天地太倉一稊米洞達乘道蘊大易乃吾體胡

為生町畦祇自揭底裏戰心作蠻觸鬪物劇角抵並行
本無恃用智私乃爾終令八尺軀瑣瑣同螻蟻

爰念算心者愈算愈無數脫兔驚處女不知竟何處豈
如千歲日坐欲窮其故清風翛然來皓月皦然去太虛
自澄湛寂歷降霜露求體與追迹抱甕渾不悟

至神妙無方倏忽驚掣電歸藏豈無所至密周匝遍君
子慎不出與民亦同患念茲即在茲過化復乘變何須
七處徵非必八還見槌碎玉連環總是光明殿

風輪載水輪天地一虛舟歷世千萬年生滅祇幾漚大
吹推濤山組練翻神洲有生當盡壞物類仍自稠漂泊
往何深推盪來亦周安得窮其原神區莽悠悠

化區一洪鑪萬化總銷鑠誰知鎔冶際圍範已附著倏
忽聚散間共是一蜩殼古今都無跡曠蕩歸冥漠易簡
故不弊悠久相盤薄若言天地壞大塊何處著

凡物皆抱一太極元有兩厥初無端倪乘化互消長何
人與安排妥帖自來往萬物儘銷沉山川空泱泱秋水

雙芙蓉玉鏡花俯仰並蒂復同根一種誰涵養

地中有晦明天體無晝夜人物互寢興擾擾爭傳舍形
器兩疣贅面目更假借化工急轉圜光景速代謝君子
惟立德乾乾擬泰華揭焉與化俱萬古常不化

誰將碧桃核種向虛空天偶然落地上紅雲滿山川秋
風實離離到處桃花然太極禪兩儀萬物相繼傳堯老
舜乃攝伯禹不與賢父父復子子一家三千年

二乃極之儀三為易真數渾然一推背竟不失故步昨

朝遶屋行百匝誦佳句日暮碧雲重寒裳自闔戶夢裏
遍天下還向家中住偶奇遂無窮總在相因處

太極易始圖先天乃心法重重自環中井井皆成八一
從孔孟後此幾無人發誰知周與邵千載合符節精窮
無餘塵表裏儘通徹青天碧玉樓影歷秋江月

太虛道之蘊太極道之體象滋本太元氣母託太始維
繫復融液有萬皆本此總向此中生會向此中死誰作
先天囊顛倒不見底我欲包無窮滿貯本然理

賦予初無私稟受各分定渙汗出大號有物歸一令羣
倫或弗從是乃與天競爾貴非吾心爾富非吾性篤恭
恒自盡慥慥言與行窮通無加損靜俟乃安命

數有本然差參伍行鬼神乾坤互傾屢氣運潛屈伸遂
生無量物乃有不盡人修短變則殊盛衰化相因向非
冰雪姿安得花柳春或欲一死生第恐理不純

元陽首庶物蒼蒼豈正色轉圓開化幾剛健乃天德伊
人體其全造命還立極往往欺以誣反復為戕賊還看

仲尼處亦是帝堯則乃謂吾不能自暴烏足責

屈平窮作問柳州怨為對蒼蒼都不聞自致誣罔罪不
周彊為柱杞人謾憂墜無擊復無罅居然誑茫昧君子
惟修身屋漏極謹畏吾心即吾天炯炯不在外

道宰藏殺幾天斷運神武剗割與裁制乃為造物主躁
欲生內兵神奇入臭腐撐裂太元體鑽穴成苦窠漫合
神農藥枉費女媧補遂成血肉運萬世一刀俎

盈盈水中荷郁郁晚內蘭娜娜楊柳春挺挺松栢寒資

度與余同生意最可看內恕惟恐傷吁嗟懼凋殘如何
被秦人伐木仍赭山又有跖之徒瀝血還膾肝

人生會有為事物各有義苟非吾所取千駟不一視我
我君子心磊磊丈夫志泰山輕鴻毛無復顧勢利悲哉
患失徒滿目惟富貴舐痔復嘗糞甘心同狗彘

道有本然分立世為大節抑抑卑高陳井井貴賤別昭
布作禮經巍巍正人極有位當自守有門誰敢越維世
為大綱少紊王政缺端本必正名大哉春秋法

姿貌爭寢揚髑髏無好醜魂氣忽登殂骨肉歸一朽中
心足良好衆美集萬有不與死生俱能同天地久粲粲
含笑人皎皎當窓牖寧知賈大夫還有射雉手

丹砂雜青空珊瑚映瑤草瑩美絕雕飾物外天然寶元
精赤子心炯炯顏色好淨徹無點滓本真當自保光明
天地藏萬象跡如掃藹然一壺春邃古常不老

鄰里遞歌哭萬古一死生不知道之常擾擾競衰榮都
為利欲驅每被寵辱驚胸中忽成敗堂上生棘荆終朝

飽則已截肉同藜羹十萬下箸難安用志慮盈

白楊纏悲風萬象總一丘前哭後還嗟相送何時休君
看華堂上幾人能自留為善已無及顧盼驚蜉蝣如何
貪生人作孽謀阻修腐敗不可埋遺臭徒千秋

形氣有盛衰魂魄共彊弱志師彊心田天地相旁薄苟
為物欲屈消沮不復作精誠百鍊鏡躍馬能矍鑠伯有
死猶見陰磷雨中著莫讀無鬼論神全鬼自却

高山洩雲峯陸物水必具野草茁獸毛林葉開鳥羽剛

柔乘萬變天地一逆數形色每相因真宰解陶鑄一受
不復易妍蚩總天賦更教影問形陶老端慕顧

嘗觀西伯易兩兩皆反對初從消內長却向進中退止
是一乾坤倍蓰生萬類如何區中人失計即憤憤吉凶
互乘除否泰相嚮背富貴爾欲榮貧賤彼何罪

重險入坎窞心術乃凌跨靈田初坦平底處藏譎詐都
因已弗盡牙角潛締架節節生城府岌岌深罟獲厭然
欺一世巖阻無隙罅誰知方寸間乃解坑天下

見通當應遠知前必念後勿謂苟且已天地甚長久雖
遮一人目難塞萬世口輪囷南箕舌轉幹北辰斗森列
甚可畏洋洋在左右克已與不欺此語宜重守

市賈爭錐刀喘汗忘昏曉夸毗角名場提踵中念擾復
有欺世徒每患機穿小易陽反為陰揭本都在杪儘為
偽妄役至死心不了焉知無事人獨立萬物表

大鵬欲南運北溟待天風龍神九地潛雲氣會相從有
形皆受制無體方獨通超然謝世塵杳杳遺孤蹤化冥

復神俱進退何雍容掌握起消息孰能為樊籠

天地無棄物聖人無棄人大澤生龍蛇原田長荆榛載
質遽出疆遑遑告時君有教不擇類善誘皆循循濟衆
已所任謀道豈謀身至哉擊磬心中有堯舜仁

飲水澹無味顏氏何所樂陋巷并日食至今見蕭索當
時一瓢中總是天人學無悔不違仁造道乃獨覺義理
泰山重富貴秋雲薄畏匡不敢死襟度何落落

通達有大鼎能函十二牛內可膳千夫外足鎮九州蒙

童抱束薪短焰如鬼幽勺水竟不熱評罵增怒尤力到
功自成適遠匪坐謀未行恐有聞千載一伸由

乾坤廓粵區衆動自紛擾萬世一寒暑往來幾昏曉茲
生顧指間倏忽急飛鳥大人車輪目獨見明瞭瞭斂藏
入化宇實出造化表道德高無極教化今未了

一理初不殊萬化各所之室中本無車門外元多岐君
子盡在我我盡夫何疑可行吾即行斯乃聖之時屢空
仍自樂途窮安足悲為告處世人勿為世塵欺

開春桃李花川原發艷陽盡室出綺羅嫵婉銜孟觴太
和暢天地晝景方舒長一旦鵙鳥鳴霜露凋衆芳短日
頽崦嵫塞向皆閉藏君子法天運行止亦其常

鸞皇翥丹霜尺鷃搶枯株知止各翱翔卑高一何殊精
衛苦填海冤憤一何愚鴈鳩不為巢亦自有所居偉哉
衡門士高卧一束書曲肱有餘樂不用長者車

死生由一陽靜陰存太樸卓午見牆影旭日昇海角焰
焰火燎原祇畏水流潑區區握苗徒強把混沌鑿黃庭

衣朱衣著意皆假合寧知歇心地自有長生藥

叔世王道缺斯人絕其綱况復異教祛曹昧皆發狂陋
儒萬口和追逐尤犇忙潤飾借寇兵倒戈蠹天常或者
以邪攻出筭復入筐吾將抱六經鑿室深山藏

悠悠窮原人極上不及下作計入鬼窟有物皆土苴兩
墮歸虛無天地亦偽假終然禍仁義舉世一野馬與物
都無情刻忍恩遂寡至今慕高遠誰是真識者

梁折入小成偽妄亂本真為我亦為義兼愛同為仁厥

初毫釐差其禍無父君向非大儒辨喪心幾殺身誰知
寂滅術遂使無人倫巍然文章伯詆斥一何勤

日出開心窓日入潛水府寤寐不在吾晦顯竟誰主橐
籥一往來何處有龍虎癡頑坐徹明曾暗睡卓午矯揉
徒自勞謾使形神苦君看乘化者徜徉樂終古

昨夢入高寒御風驂兩鸞扶搖青羅界日下看長安烈
烈丹鼎紅紫焰燒肺肝清晨餐玉屑半夜登金壇茂陵
一抔土依舊在人間鼓掌為一笑舉世皆面謾

夜窺古潭月洞徹天之心
澠朗色界異焜耀皆黃金
旁有蔚藍叢上有丹桂林
倒影下無極湛墜入幽深
衝風颯然至波蕩不可尋
始知人間世有動皆陸沉

隱几罷心官塌焉偶皆喪
忽在無生前宵處太古上
頃之開內目百骸洞五臟
知覺猶有滯尚未都無妄
遂加存養功玉宇森萬象
造化皆由吾乃見鬼神狀

濯纓厭世塵入海求夜光
貝闕涵珠宮異色森綺芒
采采滿懷袖駕龍登扶桑
赤鳥驚上天火曜舒乾陽
回視

乃瓦礫自愧空犇忙書生莫謾愚弊帚安足藏

聖域每反觀洞達萬物情知盡理自窮祇是本然明恢
廓無滯淫靜止不將迎脩然坐乘化皓月滿中庭忽聞
鴻鴈來偶聽風水聲秉燭入暗室驚落東牕螢

有物莫不由萬古長安道區區往來者總向塵中老年
年雨灑清日日風驅掃行人竟無迹涸轍生秋草我欲
謝帝閤離居事幽討束載無良辰幾回問蒼昊

一念游萬仞塊坐不盈尺片席凝塵埃顧盼竟充斥誰

知呼吸間即是一太極有鳥鳴牕疏唧唧和機織偶然
作聲聽出入幾自適但令無錯應萬類等喧寂

藏舟泰山巔偶值懷襄流忽從歸墟東直向西海頭洗
日復濯月光抱空中樓扶疎散青紅異氣纏九州忽焉
閤寒沙佇立令人愁明朝早潮來欲住不得留

興感思往事邈若不可及觀化推將來遽覺今為昔今
昔本無異至理萬世一不朽惟事業天地共終畢前波
復後波日夜奔注急祇是眼前水源深遂無極

景晏念慮歇支頤坐看山起來復何為結佩紉幽蘭萬
事從悠悠不愧俯仰間舉杯謝塵世月落梅花殘深江
總風波天淡孤鳥閒氣數當閉塞我亦方閉關

惟時屬屯蒙患難豈能免南北走孤蓬秋風任飄轉五
年一龕燈半世幾詩卷老吟調鬼神深造每懼淺久為
造物惡今日復洞闡無思重苦思甘心向連蹇

宓犧地中復唐虞天下泰三王當革命五霸極破壞孤
秦龍戰野塗地儘一敗既有昔時寅復到後來亥消長

數相因治亂更萬代無為我生初委順從運會

采杞

蕪城古道荒有杞雜荆棘西風結霜腴累累綴秋實肥
瑩珊瑚珠朱殷明欲滴長條擁寒葉射日光的爍采采
置傾筐入手火齊溼歸來奉二親黃茗紅脂泣前秋入
新館枯枝倒懸壁冬初半青乳慘淡不忍摘忽憶采杞
時樂事不可得隻身對孤叢片影深暝色王事尚稽遲
何日共子職

陵川集卷五